

Aanddiens: 19 April 2026

Leraar: Johann Herbst

Tema: Blywende Geloof

1. Geloof is om te vertrou sonder beheer

Geloof beteken nie dat ons blindelings glo nie. Inteendeel, Bybelse geloof is gegrond op kennis – ons glo omdat ons God ken. Wanneer ons nie in beheer is nie, word ons geloof getoets. Ons omstandighede kan onseker, onvoorspelbaar en selfs vreesaanjaend wees, maar ons geloof rus nie in ons vermoë om te beheer nie – dit rus in God se karakter.

Die vyand se strategie is dikwels om ons te laat twyfel aan God se goedheid, veral wanneer dinge buite beheer voel. Hy wil hê ons moet vergeet wie God is. Daarom is geloof nie net om vorentoe te kyk nie, maar ook om terug te kyk – om weer te onthou.

Ons moet doelbewus onthou:

- Wie God is.
- Wat Hy reeds gedoen het.
- Dat Hy getrou bly, selfs wanneer ons nie verstaan nie.

Geloof groei waar daar oortuiging is – 'n vaste wete dat God is wie Hy sê Hy is.

Hebreërs 11:1

2. Geloof se fondasie

Ons geloof staan nie op ons gevoelens of omstandighede nie, maar op die voltooide werk van Jesus Christus. Hy is die fondament. Deur Sy offer het Hy vir altyd voorsiening gemaak vir ons redding, vergifnis en ons verhouding met God.

Hierdie waarheid gee aan ons vrymoedigheid:

- Vrymoedigheid om na God toe te kom.
- Vrymoedigheid om vas te hou.
- Vrymoedigheid om te glo, selfs wanneer ons nie sien nie.

Geloof is dus nie 'n poging om iets by God te verdien nie, maar 'n reaksie op dit wat reeds gedoen is. Ons hou vas aan die hoop omdat God getrou is – nie omdat ons sterk is nie, maar omdat Hy getrou bly.

Hebreërs 10:12-18

Hebreërs 10:19-23

Hebreërs 11:1

Verder word ons geloof versterk wanneer ons doelbewus die werke van die Here onthou. Die Psalms leer ons hierdie beginsel – om terug te kyk en God se daede te herroep.

Wanneer ons onthou:

- Bou dit ons geloof.
- Bring dit perspektief.
- Herinner dit ons aan God se krag en karakter.

Psalm 77:12-16

3. Swaarkry en geloof

Geloof en swaarkry is nie teenstrydig nie – dit loop dikwels saam. Die vroeë gelowiges het intense swaarkry beleef, maar hulle het volhard omdat hulle geweet het daar is iets beters wat wag.

Swaarkry toets ons oortuiging en ons volharding.

Ons word opgeroep om nie ons vrymoedigheid prys te gee nie. Daar is 'n beloning vir dié wat volhard. Geloof beteken om aan te hou, selfs wanneer dit moeilik is – om vas te hou wanneer dit makliker sou wees om op te gee.

Die regverdige sal deur die geloof lewe. Ons moet nie net met geloof begin nie, maar aanhou leef deur geloof.

Hebreërs 10:32-39

4. Geloof se vrug is beter

Die vrug van geloof is beter – nie noodwendig makliker nie, maar beter. God weet wat die beste is, selfs wanneer dit nie vir ons so lyk nie.

In **Hebreërs 11:4-28** sien ons hoe geloof mense gelei het om:

- Keuses te maak wat nie altyd sin gemaak het nie.
- Oofferings te maak.
- Te vertrou op dit wat hulle nie onmiddellik gesien het nie.

Maar die resultaat was altyd dieper, ryker en meer betekenisvol, omdat dit in God gewortel was.

Geloof kies nie die maklikste pad nie – dit kies die beste pad volgens God se wil.

Slot

Blywende geloof hou aan glo:

- Wanneer jy nie in beheer is nie.
- Wanneer jy nie verstaan nie.
- Wanneer dit moeilik raak.

Want ware geloof rus nie in jou eie vermoë nie, maar in God se karakter. Hou vas – want Hy wat die belofte gemaak het, is getrou